

ঈমান ও আমলে সালেহ্

আবদুস শহীদ নাসিম

বাংলাদেশ কুরআন শিক্ষা সোসাইটি

ঈমান ও আমলে সালেহ্
আবদুস শহীদ নাসিম

©author

ISBN: 978-984-645-065-1

প্রকাশক
বাংলাদেশ কুরআন শিক্ষা সোসাইটি

পরিবেশক
বইমেলা

মগবাজার, ঢাকা, ফোন: ০১৭৫৩৪২২২৯৬

প্রকাশকাল
প্রথম প্রকাশ: নভেম্বর ২০০৯

Iman O Amle Saleh (Iman & Aml al Saleh)

By
Abdus Shaheed Naseem

Published by
Bangladesh Quran Shikkha Society

Distributor
BOIMELA
Phone: 01753422296

Print
First Edition: November 2009.

দাম: ১২.০০ টাকা মাত্র। **Price TK: 12.00 Only**

সূচিপত্র

০১. ঈমানের পরিচয়
০২. আল্লাহর প্রতি ঈমানের দাবি
০৩. অনন্ত পরকালীন জীবনে মুক্তি ও সাফল্যের রাজপথ
০৪. আমলে সালেহ্ মানে কি?
০৫. সাফল্য অর্জনের জন্যে আমলে সালেহ্‌র ভিত্তি হতে হবে ঈমান
০৬. ঈমান ও আমলে সালেহ্‌র সম্পর্ক
০৭. আমলে সালেহ্‌র বিবরণ
০৮. অন্তরের ঈমানি আমল বা আমলে সালেহ্‌ সমূহ
০৯. যবানের (মৌখিক) ঈমানি আমল বা আমলে সালেহ্‌ সমূহ
১০. শারিরিক বা বাস্তব আমলে সালেহ্‌ সমূহ : ব্যক্তিগত জীবনে
১১. বাস্তব আমলে সালেহ্‌ সমূহ : পারিবারিক জীবনে
১২. বাস্তব আমলে সালেহ্‌ সমূহ : সামাজিক জীবনে
১৩. বাস্তব আমলে সালেহ্‌ সমূহ : রাষ্ট্রীয় জীবনে
১৪. এক কেন্দ্রিক সুরভিত ফুল আর শুভ ফল

কুরআন মজিদে ঈমান ও আমলে সালেহ্‌র উল্লেখ হয়েছে যেসব আয়াতে
(দেখুন সূরা এবং আয়াত নম্বর):

২: ২৫, ৬২, ৮২, ২৭৭। ৩: ৫৭। ৪: ৫৭, ১২২, ১৭৩। ৫: ৯, ৬৯, ৯৩। ৬: ৫৪।
৭: ৪২, ১৫৩। ১০: ৪, ৯। ১১: ১১, ২৩। ১৩: ২৯। ১৪: ২৩। ১৬: ৯৭, ১১৯।
১৮: ৩০, ৮৮, ১০৭। ১৯: ৬০, ৯৬। ২০: ৭৫, ৮২। ২২: ১৪, ২৩, ৫০, ৫৬। ২৪:
৩৮, ৫৫। ২৫: ২৩, ৭০, ৭১। ২৬: ২২৭। ২৮: ৬৭, ৮০। ২৯: ৭, ৯, ৫৮। ৩০:
১৫, ৪১, ৪৪, ৪৫। ৩১: ৮। ৩২: ১৯। ৩৪: ৪, ৩৭। ৩৫: ৭। ৩৮: ২৪, ২৮।
৪০: ৪০, ৫৮। ৪১: ৮, ৩৩, ৪৬, ৫০। ৪২: ২২, ২৩, ২৬। ৪৫: ১৫, ২১, ৩০। ৪৬:
১৬। ৪৭: ২, ১২। ৪৮: ২৯। ৬৫: ১১। ৮৪: ২৫। ৮৫: ১১। ৯৫: ৬। ৯৮: ৭।
১০৩: ৩।

بِسْمِ اللَّهِ الرَّحْمَنِ الرَّحِيمِ

ঈমান ও আমলে সালেহ

০১. ঈমানের পরিচয়

ঈমান ‘আদ দীন আল ইসলাম’-এর (ইসলামী জীবন ব্যবস্থার) একটি মৌলিক পরিভাষা। এটি আরবি শব্দ এবং আম্ন (أَمْنٌ) শব্দমূল থেকে উদ্গত। এই أَمْنٌ থেকেই গঠিত হয়েছে ঈমান (إِيمَانٌ), আমানত (أَمَانَةٌ) এবং মুমিন (مُؤْمِنٌ)।

ঈমান শব্দের আভিধানিক অর্থ হলো : আশ্বাস প্রদান করা। বিশ্বাস করা। আশ্রয় গ্রহণ করা ও আশ্রয় প্রদান করা। নিরাপত্তা গ্রহণ করা ও নিরাপত্তা প্রদান করা। নিশ্চয়তা প্রদান করা ও নিশ্চয়তা লাভ করা। নির্ভয়, নিঃশংকা, নিশ্চিন্ততা, স্বস্তি ও প্রশান্তি প্রদান করা ও লাভ করা। আস্থা, বিশ্বাস ও স্বস্তি প্রদান করা এবং লাভ করা। প্রত্যয় ও নির্ভীকতা অর্জন করা।

ঈমান থেকেই আমানত শব্দটি এসেছে। ঈমান-এর যে অর্থ, আমানত-এরও সেই একই অর্থ। এর বিপরীত শব্দ হলো খিয়ানত। খিয়ানত শব্দের যে অর্থ এবং খিয়ানত বলতে মানুষ যা বুঝে তারই বিপরীত হলো ঈমান ও আমানত।

ইসলামের মৌলিক পরিভাষা হিসেবে ঈমান পরিভাষাটির মর্ম হলো-মহাবিশ্বের স্রষ্টা মহান আল্লাহর অস্তিত্ব, এককত্ব, অধিকার, ক্ষমতা ও গুণাবলী সম্পর্কে স্বচ্ছ ও সুস্পষ্ট বুঝ, জ্ঞান ও ধারণা অর্জন করে তাঁর কাছে নিজে নিরংকুশভাবে সঁপে দিয়ে নিশ্চিন্ততা, স্বস্তি ও প্রশান্তি অর্জন করা এবং অন্যসব কিছু থেকে নির্ভয় ও নির্ভীক হয়ে যাওয়া। ইসলামের পরিভাষায় এমন ব্যক্তিকেই বলা হয় মুমিন। মুমিন শব্দটি ক্রিয়া বিশেষ্য। অর্থাৎ স্থাপনকারী, গ্রহণকারী ও অর্জনকারী।

অপরদিকে আল্লাহ পাক নিজেও নিজে মুমিন বলে পরিচয় দিয়েছেন (সূরা ৫৯ আল হাশর : আয়াত ২৩)। আল্লাহর মুমিন হবার অর্থ হলো, তিনি আশ্রয়, নিরাপত্তা, নিশ্চয়তা, নিশ্চিন্ততা, নির্ভয়, স্বস্তি ও প্রশান্তি প্রদানকারী।

অর্থাৎ আল্লাহর প্রতি বিশ্বাস ও আস্থা স্থাপন করে তাঁর কাছে আশ্রয় ও নিরাপত্তা গ্রহণকারীকে তিনি আশ্রয়, নিরাপত্তা, নির্ভয়, স্বস্তি ও প্রশান্তি প্রদান করেন।

এই হলো মহান আল্লাহর প্রতি ঈমান আনার প্রকৃত মর্ম ও তাৎপর্য। এভাবে যিনি ঈমান আনেন মহান আল্লাহ প্রকৃত ক্ষতি থেকে তার নিরাপত্তা, তার মানসিক স্বস্তি ও প্রশান্তি, তার প্রকৃত কল্যাণ ও সাফল্যের

জিম্মাদার হয়ে যান। ঈমানের অস্বীকৃতিকে বলা হয় কুফর। কুফর হলো অজ্ঞতা, হঠকারিতা ও প্রবৃত্তির দাসত্বের পথ। কুফর হলো এক মহান সর্বশক্তিমান আল্লাহর পরিবর্তে অসংখ্য অক্ষম সৃষ্টির প্রভুত্ব স্বীকার করা এবং তাদের আনুগত্য ও দাসত্ব করা।

সূতরাং আল্লাহর বাণী আল কুরআনের দৃষ্টিতে:

১. মহান স্রষ্টা আল্লাহ ও মানুষের মাঝে সম্পর্কের ভিত্তি হলো ঈমান।
২. আল্লাহর জিম্মায় জীবনের প্রকৃত কল্যাণ ও সাফল্য লাভের পূর্বশর্ত হলো ঈমান।
৩. ঈমান ছাড়া হিদায়াত তথা সরল সঠিক পথ লাভ করা সম্ভব নয়।
৪. যে ব্যক্তি আল্লাহর প্রতি ঈমান আনেনা, সে তাগুতের প্রতি ঈমান রাখে।
৫. যে ব্যক্তি ঈমান আনেনা, সে জীবনের চরম ক্ষতি ও ধ্বংস থেকে তথা জাহান্নাম থেকে রক্ষা পাওয়ার সব পথই বন্ধ করে দেয়।
৬. ঈমান হলো মুক্তির পথ। আর আল্লাহর প্রতি অস্বীকৃতি হলো ধ্বংসের পথ।
৭. ঈমান বিহীন সৎকর্ম তলা বিহীন বুড়িতে রাখা মনিমানিক্যের মতোই নিষ্ফল।

০২. আল্লাহর প্রতি ঈমানের দাবি

যে কেউ জেনে বুঝে সঠিক স্বচ্ছ জ্ঞানের মাধ্যমে মহাবিশ্বের মালিক মহান আল্লাহর প্রতি ঈমান আনবে, তার প্রতি অনিবার্যভাবে বর্তায় আল্লাহর প্রতি ঈমানের কয়েকটি অপরিহার্য দাবি। সেই দাবিগুলো হলো :

১. তাকে তার এই ঈমানের সুস্পষ্ট মৌখিক ঘোষণা প্রদান করতে হবে।
২. আল্লাহ তায়ালা আরো যেসব বিষয়ের প্রতি ঈমান আনতে বলেছেন, সেসব বিষয়ের প্রতি তাকে ঈমান আনতে হবে, বিশ্বাস স্থাপন করতে হবে।
৩. তাকে তার সামগ্রিক দৃষ্টিভঙ্গি, জীবন পদ্ধতি ও কার্যক্রমে এই ঈমান বা বিশ্বাসের প্রতিফলন ঘটাতে হবে।
৪. যে মহান আল্লাহ তার ঈমান ও বিশ্বাসের মূল ভিত্তি কেবল তাঁরই হুকুম মতো তাকে জীবন যাপন করতে হবে। জীবনের সকল ক্ষেত্রে তাঁর হুকুম পালন করতে হবে। জীবনের কোনো অংশকে তাঁর আনুগত্যের বাইরে রাখা যাবেনা।
৫. তিনি যা যা নিষেধ করেছেন, নিষ্ঠা ও বিনয়ের সাথে তাঁর নিষেধ করা সকল বিষয় পরিহার ও বর্জন করতে হবে।
৬. আল্লাহর সর্বশেষ বার্তাবাহক মুহাম্মদ রসূলুল্লাহ সা.-কে জীবনের সকল ক্ষেত্রে আদর্শ ও অনুকরণীয় মডেল হিসেবে গ্রহণ করতে হবে।
৭. আল্লাহ তায়ালা সন্তুষ্টি অর্জকেই জীবনের চূড়ান্ত লক্ষ্য হিসেবে গ্রহণ করতে হবে।

৮. আল্লাহর সন্তুষ্টি অর্জন এবং তাঁর আনুগত্য ও দাসত্বের নীতিমালার সাথে যা কিছুই সাংঘর্ষিক হবে, সবই বর্জন করতে হবে।
৯. পার্থিব জীবনকে পরকালীন অনন্ত জীবনের জয়-পরাজয়ের ভিত্তি হিসেবে গ্রহণ করতে হবে এবং পার্থিব জীবনকে পরকালীন জীবনের মুক্তি ও সাফল্যের রাজপথে পরিচালিত করতে হবে।

০৩. অনন্ত পরকালীন জীবনে মুক্তি ও সাফল্যের রাজপথ

এই রাজপথের নাম ‘ঈমান ও আমলে সালেহ’। এই রাজপথের অপর নাম ‘সিরাত আল মুস্তাকিম (সরল সোজা পথ)’। সিরাত বা পথ হলো ‘ঈমান’। আল মুস্তাকিম (সরল সোজা) মানে- ‘আমলে সালেহ’।

কুরআন মজিদে ‘ঈমান’ ও ‘আমলে সালেহ’কে মুক্তি ও সাফল্যের উপায় ঘোষণা করা হয়েছে। মহান আল্লাহ বলেন:

وَبَشِّرِ الَّذِينَ آمَنُوا وَعَمِلُوا الصَّالِحَاتِ أَنَّ لَهُمْ جَنَّاتٍ تَجْرِي مِنْ تَحْتِهَا الْأَنْهَارُ كُلَّمَا رُزِقُوا مِنْهَا مِنْ ثَمَرَةٍ رَزَقُوا قَالُوا هَذَا الَّذِي رُزِقْنَا مِنْ قَبْلُ وَأُتُوا بِهِ مُتَشَابِهًا وَلَهُمْ فِيهَا أَنْوَاعٌ مُطَهَّرَةٌ •

অর্থ: যারা ঈমান আনবে এবং আমলে সালেহ করবে, তাদের সুসংবাদ দাও যে : তাদের জন্যে রয়েছে উদ্যান আর বাগবাগিচা, সেগুলোর নিচে দিয়ে বহমান থাকবে নদ-নদী বাণাধারা। আর তাদের জন্যে সেখানে থাকবে অনাবিল পবিত্র জুড়ি। (সূরা ২ আল বাকার : আয়াত ২৫)

إِنَّ الَّذِينَ آمَنُوا وَعَمِلُوا الصَّالِحَاتِ يَهْدِيهِمْ رَبُّهُمْ بِإِيمَانِهِمْ •
تَجْرِي مِنْ تَحْتِهِمُ الْأَنْهَارُ فِي جَنَّاتِ النَّعِيمِ •

অর্থ: যারা ঈমান আনে এবং আমলে সালেহ করে, তাদের প্রভু তাদের ঈমানের ভিত্তিতে তাদের পরিচালিত করেন জান্নাতুন নায়ীম-এর দিকে, যেগুলোর নিচে দিয়ে থাকবে বহমান নদ-নদী বাণাধারা। (সূরা ১০ ইউনুস: আয়াত ৯)

وَعَدَ اللَّهُ الَّذِينَ آمَنُوا وَعَمِلُوا الصَّالِحَاتِ لَهُمْ مَغْفِرَةٌ وَأَجْرٌ عَظِيمٌ •

অর্থ: যারা ঈমান আনবে এবং আমলে সালেহ করবে, আল্লাহ তাদের প্রতিশ্রুতি দিয়েছেন ক্ষমার এবং মহা পুরস্কারের। (সূরা ৫ আল মায়িদা: ৯)

إِنَّ الَّذِينَ آمَنُوا وَعَمِلُوا الصَّالِحَاتِ كَانَتْ لَهُمْ جَنَّاتُ الْفِرْدَوْسِ
أُولَىٰ • خَالِدِينَ فِيهَا لَا يَبْغُونَ عَنْهَا حِوَلًا •

অর্থ: যারা ঈমান আনে এবং আমলে সালাহ করে, তাদের আপ্যায়ন করার জন্যে রয়েছে জান্নাতুল ফেরদাউস। সেখানে থাকবে তারা চিরদিন। সেখান থেকে তারা স্থানান্তর হতে চাইবেনা কখনো। (সূরা ১৮ কাহফ: ১০৭-১০৮)

وَعَدَ اللَّهُ الَّذِينَ آمَنُوا مِنْكُمْ وَعَمِلُوا الصَّالِحَاتِ لَيَسْتَخْلِفَنَّهُمْ فِي الْأَرْضِ كَمَا اسْتَخْلَفَ الَّذِينَ مِنْ قَبْلِهِمْ وَلَيُمَكِّنَنَّ لَهُمْ دِينَهُمُ الَّذِي ارْتَضَىٰ لَهُمْ وَلَيُبَدِّلَنَّهُمْ مِنْ بَعْدِ خَوْفِهِمْ أَمْنًا •

অর্থ: তোমাদের মধ্যে যারা ঈমান আনে এবং আমলে সালাহ করে, আল্লাহ তাদের প্রতিশ্রুতি দিচ্ছেন, তিনি অবশ্যি তাদের পৃথিবীতে খিলাফত (রাষ্ট্র ক্ষমতা) দান করবেন, যেমনিভাবে খিলাফত দান করেছিলেন তাদের পূর্ববর্তী লোকদের; তিনি প্রতিষ্ঠিত করে দেবেন তাদের মনোনীত পছন্দের দীনকে, তাদের ভয়ভীতি ও আতংকের পরিবেশকে বদল করে তাদের প্রদান করবেন নিরাপত্তার পরিবেশ। (সূরা ২৪ আন নূর : আয়াত ৫৫)

وَالَّذِينَ آمَنُوا وَعَمِلُوا الصَّالِحَاتِ لَنُكَفِّرَنَّ عَنْهُمْ سَيِّئَاتِهِمْ وَلَنَجْزِيَنَّهُمْ أَحْسَنَ الَّذِي كَانُوا يَعْمَلُونَ •

অর্থ: যারা ঈমান আনে এবং আমলে সালাহ করে, আমি অবশ্যি মিটিয়ে (মুছে) দেবো তাদের সমস্ত মন্দকর্ম এবং তাদের প্রতিফল দেবো তাদের উত্তম কর্মের ভিত্তিতে। (সূরা ২৯ আনকাবুত : আয়াত ৭)

إِنَّ الَّذِينَ آمَنُوا وَعَمِلُوا الصَّالِحَاتِ أُولَٰئِكَ هُمْ خَيْرُ الْبَرِيَّةِ

অর্থ: যারা ঈমান আনে এবং আমলে সালাহ করে, তারাই সৃষ্টির শ্রেষ্ঠ। (সূরা ৯৮: আয়াত ৭)

لَقَدْ خَلَقْنَا الْإِنْسَانَ فِي أَحْسَنِ تَقْوِيمٍ • ثُمَّ رَدَدْنَاهُ أَسْفَلَ سَافِلِينَ •

إِلَّا الَّذِينَ آمَنُوا وَعَمِلُوا الصَّالِحَاتِ فَلَهُمْ أَجْرٌ غَيْرُ مَمْنُونٍ •

অর্থ: আমি মানুষকে সৃষ্টি করেছি সর্বোত্তম গঠনে (We created man in the best stature)। তারপর তাকে নামিয়ে দিই নিচুদের চেয়েও নিচে; তবে তাদেরকে নয়, যারা ঈমান আনে এবং আমলে সালাহ করে। তাদের জন্যে তো রয়েছে অফুরন্ত পুরস্কার। (সূরা ৯৫ আত তীন : আয়াত ৪-৬)

إِنَّ الْإِنْسَانَ لِفِي خُسْرٍ • إِلَّا الَّذِينَ آمَنُوا وَعَمِلُوا الصَّالِحَاتِ وَتَوَاصَوْا بِالْحَقِّ وَتَوَاصَوْا بِالصَّبْرِ •

অর্থ: নিশ্চয়ই মানুষ নিশ্চিত ক্ষতির মধ্যে রয়েছে, তবে তারা নয়, যারা ঈমান আনে, আমলে সালেহু করে আর যারা পরস্পরকে সত্য ও ন্যায়ের উপদেশ দেয় এবং (এর উপর) দৃঢ়তা অবলম্বনের জন্যে অসিয়ত করে। (সূরা ১০৩: আয়াত ২-৩)

অনুরূপ আয়াত আরো অনেক রয়েছে আল কুরআনে। এখানে কয়েকটি মাত্র উল্লেখ করলাম।

০৪. আমলে সালেহু মানে কি?

মহান আল্লাহর বাণী থেকে একথা পরিষ্কার হয়ে গেলো, চিরক্ষতি ও ধ্বংসের হাত থেকে রক্ষা পাওয়া, জাহান্নাম থেকে মুক্তি পাওয়া, ক্ষমা লাভ, চিরন্তন সাফল্য ও জাহান্নামের সৌভাগ্য অর্জন করা, পৃথিবীর প্রতিনিধিত্বের কর্তৃত্ব লাভ করা, দীন প্রতিষ্ঠিত করা এবং শান্তি ও নিরাপত্তা লাভ করার পূর্বশর্ত হলো ‘ঈমান ও আমলে সালেহু’। কিন্তু প্রশ্ন হলো আমলে সালেহু মানে কি? কী এর মর্ম ও তাৎপর্য?

সাধারণত কুরআনের অনুবাদে আমলে সালেহুর অর্থ করা হয়, ‘নেক আমল’ বা ‘ভালো কাজ’ বা ‘সৎ কাজ’। অবশ্য অনুবাদ তো আর ব্যাখ্যা বা তফসির নয়। তাই অনুবাদে এর চাইতে অধিক মর্ম প্রকাশ করাও সম্ভব নয়। কিন্তু আমলে সালেহুর মর্ম ও তাৎপর্য এতোটুকুই নয়। কথাটি খুবই তাৎপর্যপূর্ণ এবং ব্যাপক অর্থবহ। উৎসুক পাঠকগণের উদ্দেশ্যে আমরা এখানে আমলে সালেহুর আভিধানিক ও পারিভাষিক দিক থেকে যথার্থ মর্ম ও তাৎপর্য তুলে ধরতে চাই।

صَلَحَ শব্দটি একবচন, এর বহুবচন صَلَاحَاتٌ। এই صَلَحَ শব্দটি উদ্গত হয়েছে صَلَحَ শব্দমূল (rootword) থেকে। বিখ্যাত আরবি ইংরেজি অভিধান ‘মুজাম আল লুগাহ আল আরাবিয়া আল মুয়াসিরাহ’ তে

(by Milton cowan) صَلَحَ শব্দের অর্থ লেখা হয়েছে নিম্নরূপ :

to be good, right , proper, in order, righteous, pious Godly. to be well, to be usable, practicable, suitable, appropriate. to be admissible, permissible. to be valid. to put in order, settle, adjust, make amends. to mend, improve, fix, repair. to make peace, become reconciled, make up. to poster peace (between), reconcile (among people). to make suitable, modify. To reform. to remove, remedy. to make arable, reclaim, cultivate. to further, promote, encourage. Bring good luck. To agree, accept, adopt.

এই صَلَحَ থেকে গঠিত শব্দগুলোর অর্থ লেখা হয়েছে নিম্নরূপ:

صُلْح (সুল্হ): Peace, settlement, composition, compromise, peace making.

صَلَح (সালাহ): goodness, properness, rightness; practicability.

صَلَاحِيَّة (সালাহিয়াহ): fitness, efficiency; practicability, proper, competence.

إِصْلَاح (ইসলাহ): restoration, improvement, correction; adjustment, remedying, elimination, establishment of peace; compromise, peace making.

صَالِح (সালাহ): good, right, proper, sound; through, substantial, out and out, solid; virtuous, pious, devout, goodly; usable, useful, practicable, serviceable, suitable, appropriate; fit for action.

আমরা জানি ‘আমল’ (عمل) মানে- কর্ম ও আচরণ। তাহলে ‘আমলে সালাহ্’ মানে কী দাড়াই? মূলত আমলে সালাহ্ মানে সেই সব কর্ম ও আচরণ যা صَلَح শব্দ মূলের অর্থের মধ্যে এবং صَلَح থেকে গঠিত শব্দ সমূহের মর্মের মধ্যে নিহিত রয়েছে।

উপরে বর্ণিত আভিধানিক অর্থের আলোকে আমরা বলতে পারি, ‘আমলে সালাহ্’ মানে- সেইসব কর্ম ও আচরণ, যা ভালো, উত্তম, উৎকৃষ্ট, সৎ, সঠিক, যথার্থ, গ্রহণযোগ্য, আল্লাহ নির্দেশিত, সর্বজন স্বীকৃত ন্যায্য ও বাস্তব।

আমলে সালাহ্ মানে- শান্তি, শান্তি স্থাপন, সমঝোতা স্থাপন, মিলে মিশে চলা, নিষ্পত্তি করে নেয়া। মধ্যপন্থা অবলম্বন করা। সমঝোতা করে চলা, সন্ধি স্থাপন করা। মীমাংসা করে নেয়া। সংঘমশীল হওয়া।

আমলে সালাহ্ মানে- যোগ্যতা, কর্মদক্ষতা ও উপযুক্ততা অর্জন করা, যোগ্যতা ও দক্ষতা অর্জনের কাজ করা, নিজেকে যোগ্য, প্রয়োজনীয় ও উপযুক্ত বানানোর কাজ করা। ধারণ ক্ষমতা ও সক্ষমতা অর্জন করা।

আমলে সালাহ্ মানে সেইসব কাজ- যা উপকারী, সাহায্যকারী, কল্যাণকর, উন্নতিদানকারী; যা সুবিধাদানকারী, ফলদায়ক, লাভজনক।

আমলে সালাহ্ অর্থ- সংস্কার, সংশোধন, পরিমার্জন, পুনর্নির্মাণ, পুণর্বহাল, পুনর্মিলন, নিরাময়, খাদ পরিশোধন ও পরিশুদ্ধির কাজ করা।

আমলে সালেহ্ মানে- পরামর্শ করে কাজ করা, উপদেশ গ্রহণ করা, স্বীকৃত পন্থায় কাজ করা।

আমলে সালেহ্ মানে- ভদ্র, সৌজন্য মূলক এবং সুন্দর ও চমৎকার আচরণ করা।

০৫. সাফল্য অর্জনের জন্যে আমলে সালেহ্‌র ভিত্তি হতে হবে ঈমান

ঈমান বিহীন আমলে সালেহ্ নিষ্ফল। প্রকৃত পক্ষে ঈমান বিহীন আমল বা কাজকে আমলে সালেহ্ বলা যায়না। তাই ইসলামের দৃষ্টিতে মানুষের আমল বা কর্ম ও আচরণ আট প্রকার :

১. সর্ব স্বীকৃত মন্দ ও নিন্দনীয় কাজ।
২. জঘন্য দুষ্কর্ম ও অপরাধ মূলক কাজ।
৩. মুহাম্মদ রসূলুল্লাহ সা.-এর মাধ্যমে প্রদত্ত আল্লাহর শরিয়ায় অপছন্দনীয় কাজ।
৪. আল্লাহ প্রদত্ত শরিয়ায় নিষিদ্ধ কাজ।
৫. সর্বস্বীকৃত ভালো ও প্রশংসনীয় কাজ।
৬. সর্বোৎকৃষ্ট ও কল্যাণময় কাজ।
৭. মুহাম্মদ রসূলুল্লাহ সা.-এর মাধ্যমে প্রদত্ত আল্লাহর শরিয়ায় পছন্দনীয় কাজ।
৮. আল্লাহ প্রদত্ত শরিয়ায় বিধিবদ্ধ ও নির্দেশিত কাজ।

শেষোক্ত চার প্রকারের কাজই আমলে সালেহ্। আমলে সালেহ্ আল কুরআনের একটি পরিভাষা। তাই কুরআনের পরিভাষায় ঈমান-এর ভিত্তিতে বা ঈমান এনে অথবা মুমিন অবস্থায় এই চার প্রকারের কাজ করা হলে সেগুলো আমলে সালেহ্ হিসেবে গণ্য হবে। উল্লেখ্য, সর্বস্বীকৃত ভালো ও মন্দ কাজ ইসলামি শরিয়তেও ভালো এবং মন্দ কাজ হিসেবে অনুমোদিত।

উপরে صَلَاح (সালাহা) থেকে উদ্গত সবগুলো শব্দের যেসব আভিধানিক অর্থ ও মর্ম উল্লেখ করা হয়েছে, ঈমানদার অবস্থায় বা ঈমানের ভিত্তিতে সে কাজগুলো করা হলে, সেগুলো সবই ‘আমলে সালেহ্’ বলে গণ্য হবে।

আমলে সালেহ্‌র জন্যে আল্লাহর পক্ষ থেকে ক্ষমা এবং যেসব পুরস্কার ও শুভ প্রতিফলের ঘোষণা দেয়া হয়েছে, তা লাভ করবে কেবল তারাই, যারা আল্লাহর প্রতি ঈমান রাখে এবং ঈমানের দাবি অনুযায়ী আমল করে। যারা আল্লাহর প্রতি ঈমান রাখেনা, আল্লাহর কাছে তাদের কোনো প্রাপ্য নেই। এ হচ্ছে অনেকটা নগরের পানি ও বিদ্যুত সরবরাহ কর্তৃপক্ষের মতো। যারা এসব কর্তৃপক্ষকে এবং তাদের নিয়মকানুন মেনে নিয়ে তাদের বিদ্যুত ও পানির লাইনের সাথে সংযোগ স্থাপন করবে, তারাই এদের সরবরাহকৃত বিদ্যুত ও পানি পাবে, অন্যরা পাবেনা।

মোট কথা, আমলে সালাহর ভিত্তি হলো ঈমান। ঈমান ছাড়া ভালো কাজের ফল লাভ করা যাবেনা। একটু আগেই আমরা আল কুরআনের যেসব আয়াত উল্লেখ করেছি, সেসব আয়াতে একথা স্পষ্টভাবে উল্লেখ হয়েছে। আরো দুটি আয়াত দেখুন:

مَنْ عَمِلَ صَالِحًا مِّنْ ذَكَرٍ أَوْ أُنْثَىٰ وَهُوَ مُؤْمِنٌ فَلَنُحْيِيَنَّهٗ حَيَاتًا طَيِّبَةً
وَلَنَجْزِيَنَّهُمْ أَجْرَهُمْ بِأَحْسَنِ مَا كَانُوا يَعْمَلُونَ •

অর্থ : ঈমান এনে যেকোনো পুরুষ বা নারী আমলে সালাহ করবে, আমি তাকে দান করবো উত্তম পবিত্র জীবন এবং তাদের পুরস্কার দেবো তাদের সবচেয়ে ভালো কাজগুলোর ভিত্তিতে। (সূরা ১৬ আন নহল : আয়াত ৯৭)

وَأَمَّا مَن آمَنَ وَعَمِلَ صَالِحًا فَلَهُ جَزَاءُ الْحُسْنَىٰ ۖ وَسَنَقُولُ لَهُ مِن
أَمْرِنَا يُسْرًا •

অর্থ: তবে যে কেউ ঈমান আনবে এবং আমলে সালাহ করবে, তার জন্যে থাকবে সর্বোত্তম পুরস্কার এবং তার প্রতি আমার বিষয়গুলো বলবো সহজভাবে। (সূরা ১৮ আল কাহফ : আয়াত ৮৮)

০৬. ঈমান ও আমলে সালাহর সম্পর্ক

ঈমানের সাথে আমলে সালাহর সম্পর্ক অবিচ্ছেদ্য। এ দুটি বিষয়কে আলাদা করে দেখার কোনো সুযোগ নেই। ইসলামি উম্মাহর শ্রেষ্ঠ ইমাম মুজতাহিদগণ একমত হয়েছেন যে, ঈমানের তিনটি অবিচ্ছেদ্য অংগ রয়েছে। সেগুলো : ১. আন্তরিক বিশ্বাস, ২. মৌখিক ঘোষণা এবং ৩. কর্মে বাস্তবায়ন বা সম্পাদন। এই তিনটির সমন্বিত রূপই ঈমান। উদাহরণ স্বরূপ আল্লাহর প্রতি ঈমানের অর্থ হলো:

১. আল্লাহর অস্তিত্ব, এককত্ব, গুণাবলী, ক্ষমতা ও অধিকারের প্রতি বিশ্বাস।
২. এ বিশ্বাসের বিষয়ে মৌখিক ঘোষণা প্রদান করা এবং
৩. এ বিশ্বাসের ভিত্তিতে জীবন যাপন করা বা জীবনের সকল কর্ম সম্পাদন করা।

এই তিনটি বিভাগের সম্মিলিত ও সমন্বিত রূপই হলো ঈমান। সুতরাং ঈমানের মধ্যেই রয়েছে আমলে সালাহ। অথবা কথাটা এভাবেও বলা যায় যে, আমলে সালাহ মূলত ঈমানেরই শাখা প্রশাখা।

যেমন একটি উৎকৃষ্ট জাতের গাছ। এ গাছটির সাথে অবিচ্ছেদ্যভাবে জড়িত রয়েছে:

১. সেই বীজ, যা থেকে গাছটি উৎপন্ন হয়েছে, ২. গাছটির শেকড়, ৩. গাছটির কান্ড, ৪. গাছটির ডাল-শাখা-প্রশাখা, ৫. গাছটির ফুল ও ফল।

আল্লাহর রসূল সা. বলেছেন: ঈমানের রয়েছে ষাটের (সহীহ বুখারি) কিছু অধিক বা সত্তরের (সহীহ মুসলিম) কিছু অধিক শাখা। এর মধ্যে শ্রেষ্ঠ হলো ‘আল্লাহ ছাড়া কোনো ইলাহ নেই’-এই ঘোষণা দেয়া। ছোট হলো, জনপথ থেকে ক্ষতিকর জিনিস অপসারণ করা। লজ্জাশীলতাও ঈমানের একটি শাখা।”

এ হাদিসের ভিত্তিতে শাহ অলি উল্লাহ দেহলভী রহ. বলেছেন, ‘প্রতিটি ভালো কাজই ঈমানের অংগ।’

০৭. আমলে সালেহর বিবরণ

আল্লাহ তায়ালা কুরআন মজিদে আমলে সালেহর তালিকা প্রদান করেননি। আল্লাহর রসূল সা. মানুষকে কুরআন বুঝিয়ে দিয়েছেন। তাঁর সামগ্রিক কর্ম ও বাণীতে আমলে সালেহর পরিচয় পেশ করেছেন। নিজেকে আমলে সালেহর মডেল (নমুনা) হিসেবে উপস্থাপন করেছেন। সাহাবায়ে কিরামকে গড়ে তুলেছেন সেই মডেলের আদলে। তিনি আমলে সালেহর ধারাবাহিক কোনো তালিকা আমাদের দিয়ে যাননি। তবে তাঁর বাণীতে ব্যাপকভাবে আমলে সালেহর কথা উল্লেখ আছে।

উপরে আমরা ঈমানের শাখা প্রশাখা সংক্রান্ত যে হাদিসটি উল্লেখ করেছি, তাতে ঈমানের শাখার সংখ্যা ষাটের বা সত্তরের অধিক বলা হলেও এর অর্থ ‘অনেক’। অর্থাৎ ঈমানের শাখা প্রশাখা অনেক।

বিভিন্ন হাদিসে দেখা যায়, রসূলুল্লাহ সা. বিভিন্ন কাজকে ঈমানের অঙ্গ এবং শাখা প্রশাখা বলে উল্লেখ করেছেন।

এজন্যে আমরা দেখতে পাই, অতীতের হাদিস বিশেষজ্ঞগণ কুরআন ও হাদিসের ভিত্তিতে ঈমানের শাখা প্রশাখা তথা আমলে সালেহর তালিকাও প্রণয়ন করেছেন। ইমাম বায়হাকি এবং সহীহ বুখারির খ্যাতনামা ব্যাখ্যাতা আল্লামা ইবনে হাজার আসকালানি তাদের গ্রন্থে এ তালিকা তৈরি করে দিয়েছেন।

ইমাম ইবনে হাজার-এর মতে ঈমানের শাখা সমূহ সম্প্রসারিত হয়েছে:

১. মানুষের অন্তরের আমলের মধ্যে (২২টি);
 ২. মানুষের যবানি (মৌখিক) আমলের মধ্যে (৭টি);
 ৩. মানুষের শারিরিক আমল বা বাস্তব কর্মের মধ্যে (৩৮টি)। মোট ৬৭টি।
- তিনি মানুষের শারিরিক আমল বা বাস্তব কর্ম সমূহকে পুনরায় তিনভাগে

ভাগ করেছেন। সেগুলো হলো: ১. মানুষের ব্যক্তিগত জীবনের সাথে জড়িত আমল, ২. পারিবারিক ও বংশীয় জীবনের সাথে সম্পর্কিত আমল, ৩. দলীয়, সামাজিক ও রাষ্ট্রীয় জীবনের সাথে জড়িত আমল।

তবে হাদিসে উল্লেখিত সংখ্যা মূলত আধিক্য বুঝানোর জন্যেই ব্যবহৃত হয়েছে। তাই বাস্তবে ঈমানের শাখা সমূহ আরো অনেক বেশি। যেমন- হাদিসে আল্লাহ তায়ালায় সুন্দর নামসমূহের সংখ্যা উল্লেখ হয়েছে এক কম একশত বা নিরানব্বই। বর্ণনাকারীগণ নিরানব্বইটি নামের তালিকাও বর্ণনা করেছেন। কিন্তু বাস্তবে আল্লাহর সুন্দর নাম সমূহের সংখ্যা আরো অনেক বেশি। এমনকি বিভিন্ন বর্ণনাকারীর বর্ণিত তালিকা সমন্বিত করলে সেগুলোর সংখ্যাও দেড় শতের কাছাকাছি দাঁড়ায়।

আমরা এখানে আল্লামা ইবনে হাজার আসকালানির শ্রেণী বিভাগ অনুযায়ী আমলে সালেহ বা ঈমানের শাখা প্রশাখা সমূহের একটি তালিকা পেশ করছি। তবে তাঁর উল্লেখিত সংখ্যাগুলোর তুলনায় আমাদের উদ্ধৃত সংখ্যা বেশি হলে তাতে দোষের কিছু নেই। কারণ, আমরা কুরআন হাদিসের ভিত্তিতেই এ তালিকা উল্লেখ করছি। তবে এ তালিকাকে বা কোনো তালিকাকেই চূড়ান্ত তালিকা মনে করা যাবেনা। কারণ, কুরআন হাদিসের গবেষণার ভিত্তিতে তালিকা অবশ্যি দীর্ঘায়িত হতে পারে।

০৮. অন্তরের ঈমানি আমল বা আমলে সালেহ সমূহ

০১. আল্লাহর প্রতি ঈমান। এর মধ্যে রয়েছে আল্লাহর অস্তিত্ব, এককত্ব, গুণাবলী, ক্ষমতা ও অধিকারের প্রতি ঈমান।
০২. আখিরাতের প্রতি ঈমান। এর মধ্যে রয়েছে : পুনরুত্থান, হাশর, হিসাব, বিচার, সিরাত, জান্নাত, জাহান্নাম।
০৩. ফেরেশতাদের প্রতি ঈমান।
০৪. কুরআনের প্রতি ঈমান। পূর্বে অবতীর্ণ আল্লাহর কিতাব সমূহের প্রতি ঈমান। হিদায়াত গ্রহণ করতে হবে শুধুমাত্র কুরআন থেকে - এ কথার প্রতি ঈমান।
০৫. মুহাম্মদ রসূলুল্লাহ সা.-এর নবুয়্যত ও রিসালাতের প্রতি ঈমান। এর মধ্যে রয়েছে: মুহাম্মদ সা. সর্বশেষ নবী ও রসূল -এ কথার প্রতি ঈমান। অনুসরণ করতে হবে শুধুমাত্র মুহাম্মদ সা.-কে,- এ কথার প্রতি ঈমান।
০৬. মুহাম্মদ সা.-এর পূর্বে প্রেরিত নবী ও রসূলগণের প্রতি ঈমান।
০৭. তকদির-এর প্রতি ঈমান। আল্লাহর ফায়সালার প্রতি সম্ভ্রষ্ট থাকা।
০৮. আল্লাহ তায়ালায় প্রতি সর্বাধিক ভালোবাসা পোষণ। আল্লাহর উপর তাওয়াক্কুল করা।
০৯. আল্লাহকে ভয় করা। আল্লাহর প্রতি সুধারণা পোষণ করা।

১০. সকল কাজ আল্লাহর জন্যে করা, মহান আল্লাহর সন্তুষ্টি লাভের উদ্দেশ্যে করা।
১১. আল্লাহর সন্তুষ্টির উদ্দেশ্যে কাউকেও ভালোবাসা।
১২. আল্লাহর সন্তুষ্টির উদ্দেশ্যে কারো সাথে শত্রুতা করা।
১৩. আখিরাতের সাফল্য অর্জনের সংকল্প নিয়ে কাজ করা।
১৪. আল্লাহর অনুগ্রহ এবং রহমতের আশা পোষণ করা।
১৫. ঈমান ও আমলের ইখলাস অর্থাৎ আন্তরিকতা ও একনিষ্ঠতা।
১৬. মুহাম্মদ রসূলুল্লাহ সা- কে সর্বোত্তম আদর্শ বা নমুনা (মডেল) হিসাবে গ্রহণ করা।
১৭. মুহাম্মদ রসূলুল্লাহ সা.- এর প্রতি ভালোবাসা পোষণ করা।
১৮. আল্লাহর প্রতি এবং রসূল সা.-এর প্রতি আনুগত্য। এছাড়াও আল্লাহর নির্দেশিতদের প্রতি আনুগত্য।
১৯. সবর, ধৈর্য, কৃতজ্ঞতাবোধ (সবর ও শোকর)।
২০. দয়া, করুণা. সহানুভূতি।
২১. বিনয়। যেমন- অহংকার বর্জন, হিংসা না করা, ক্ষতি সাধনের সংকল্প না করা, নিজ মতকে অগ্রাধিকার না দেয়া।
২২. আল্লাহকে স্মরণ করা। আল্লাহর কাছে কামনা ও প্রার্থনা করা।
২৩. দীনের উপর অটল থাকা।
২৪. কুরআনের প্রতি সম্মান, মর্যাদা ও ভালোবাসা পোষণ করা।
২৫. ভালো কাজে আনন্দ ও মন্দ কাজে মর্মপীড়া অনুভব করা।
২৬. তওবা করা (অন্যায়, অপরাধ ও পাপকাজের জন্যে অনুতপ্ত হওয়া)।
২৭. আত্মসম্মানবোধ।
২৮. লজ্জাশীলতা।
২৯. দুনিয়ার মোহ ত্যাগ করা।
৩০. নিজের জন্যে যা পছন্দ অপরের জন্যে তাই পছন্দ করা।
৩১. মুসলিমদের কল্যাণ কামনা করা।
৩২. শয়তানকে শত্রু হিসেবে গ্রহণ।
৩৩. মুমিনদের বন্ধু হিসেবে গ্রহণ করা।
০৯. যবানের (মৌখিক) ঈমানি আমল বা আমলে সালেহ্ সমূহ
 ০১. আল্লাহর একত্ব ও মুহাম্মদ সা.-এর রিসালাতের সাক্ষ্য প্রদান (শাহাদাহ্)।
 ০২. ইলম অর্জন করা।
 ০৩. কুরআন পাঠ ও অধ্যয়ন করা।
 ০৪. আল্লাহর যিকর করা। তাঁর তসবীহ ও প্রশংসা প্রকাশ করা।
 ০৫. আল্লাহর কাছে চাওয়া, আল্লাহকে ডাকা।
 ০৬. আল্লাহর দিকে ডাকা। দাওয়াত দান করা।

১৬ ঈমান ও আমলে সালেহ

০৭. শিক্ষা দান করা।
০৮. ক্ষমা প্রার্থনা করা (ইস্তিগফার)।
০৯. নিজেকে মুসলিম বলে পরিচয় দেয়া।
১০. আল্লাহর প্রতি কৃতজ্ঞতা প্রকাশ করা।
১১. উত্তম ও সুন্দর কথা বলা।
১২. সত্য কথা বলা।
১৩. ন্যায় কথা বলা।
১৪. বেহুদা কথা থেকে বিরত থাকা।
১৫. অশ্লীল কথা থেকে বিরত থাকা।

১০. শারিরিক বা বাস্তব আমলে সালেহ্ সমূহ : ব্যক্তিগত জীবনে

০১. মানসিক ও শারিরিক পবিত্রতা অর্জন করা।
০২. গোপন অংগ সমূহ ঢেকে রাখা (সতর করা)।
০৩. সালাত আদায় করা (ফরয, নফল)।
০৪. যাকাত পরিশোধ করা।
০৫. রোযা রাখা (ফরয, নফল)।
০৬. হজ্জ করা।
০৭. উমরা করা।
০৮. কা'বা ঘর তাওয়াফ করা।
০৯. দান সদকা করা।
১০. হাসি মুখে কথা বলা।
১১. মান্নত পূর্ণ করা।
১২. কাফফারা আদায় করা।
১৩. ই'তেকাফ করা।
১৪. দাস মুক্ত করা।
১৫. লাইলাতুল কদর-এর সন্ধানে রাত জাগা।
১৬. নিজ দীনের হিফায়ত করা (প্রয়োজনে হিজরত করা)।
১৭. নিখাদ ঈমান প্রমাণ করার প্রচেষ্টা চালিয়ে যাওয়া।
১৮. প্রতিশ্রুতি পূর্ণ করা।
১৯. আমানত রক্ষা করা।
২০. হালাল পানাহার করা।
২১. হারাম বর্জন করা।
২২. লজ্জাস্থানের হিফায়ত করা। অশ্লীলতা বর্জন করা।
২৩. হিজাব করা।
২৪. উত্তম চরিত্র অর্জন করা।
২৫. সকল ভালো কাজ আল্লাহর নাম নিয়ে আরম্ভ করা।

১১. বাস্তব আমলে সালেহ্ সমূহ : পারিবারিক জীবনে

০১. বিয়ে শাদী করে পবিত্র জীবন যাপন করা।
০২. স্ত্রীর মোহরানা আদায় করা।
০৩. স্বামীর হক আদায় করা।
০৪. স্ত্রীর হক আদায় করা।
০৫. পিতা মাতার প্রতি ইহসান করা (সর্বোত্তম আচরণ করা)। তাদের সম্মান করা। তাদের কষ্ট না দেয়া। তাদের আনুগত্য করা। তাদের যাবতীয় অধিকার প্রদান করা।
০৬. সন্তান লালন পালন করা। শিশুদের মাতৃদুগ্ধ পান করানো।
০৭. সন্তানদের সুশিক্ষা দান করা। তাদের অধিকার প্রদান করা।
০৮. রক্ত সম্পর্ক অক্ষুণ্ন ও অটুট রাখা।
০৯. আত্মীয় স্বজনের হক আদায় করা।
১০. উত্তরাধিকার বন্টন করা।
১১. অসিয়ত করা এবং অসিয়ত পূর্ণ করা।
১২. মেহমানদারি করা।
১৩. স্বামীর কর্তৃত্ব মেনে চলা। স্ত্রীর প্রতি উত্তম আচরণ করা।
১৪. চাকর চাকরানি বা গৃহকর্মীদের প্রতি সদয় ও কোমল আচরণ করা।
১৫. স্ত্রী ও পরিবার থেকে আলাদা হয়ে বৈরাগী জীবন যাপন না করা।

১২. বাস্তব আমলে সালেহ্ সমূহ : সামাজিক জীবনে

০১. সালাম দেয়া। সালামের জবাব দেয়া।
০২. রোগীর সেবা যত্ন করা, চিকিৎসা করা।
০৩. অভাবী ও দরিদ্রদের সাহায্য সহযোগিতা করা।
০৪. প্রতিবেশীদের সাথে সুসম্পর্ক রাখা। তাদের সুখে দুঃখে শরিক হওয়া।
০৫. পরোপকার করা। আশ্রয়হীনকে আশ্রয় দেয়া।
০৬. মৃতের দাফন কাফন ও জানাযার ব্যবস্থা করা।
০৭. মসজিদ নির্মাণ করা। সালাতের জামাত কায়ম করা।
০৮. মানুষের সাথে সদাচরণ করা। মন্দ আচরণ বর্জন করা।
০৯. মানুষকে আল্লাহর দিকে দাওয়াত দান করা।
১০. হকের উপদেশ দেয়া। হকের উপর অটল থাকার (সবরের) উপদেশ দেয়া।
১১. বিরোধ মীমাংসা করে দেয়া।
১২. বিয়ে শাদীর প্রস্তাব দেয়া, মধ্যস্থতা করা এবং সহযোগিতা করা।
১৩. আমানত ফেরত দেয়া। খেয়ানত না করা।
১৪. অংগিকার, চুক্তি, প্রতিশ্রুতি পূর্ণ করা।
১৫. সাময়িক ও স্থায়ী জনকল্যাণের কাজ করা।

১৬. শিক্ষা সম্প্রসারণ করা।
১৭. পরস্পরের সংশোধন করা। দীনি ভাইদের সহযোগিতা করা।
১৮. অপর ভাইয়ের দোষ গোপন করা।
১৯. কাফির মুশরিকদের সাথে বন্ধুতা না করা। (তবে সদাচরণ করতে হবে)।
২০. হাঁচি দাতার ‘আলহামদুলিল্লাহ’র জবাবে ‘ইয়ারহামুকাল্লাহ’ বলা।
২১. সৎ ও কল্যাণের কাজে পরস্পরকে সহযোগিতা করা।
২২. অসৎ ও অকল্যাণের কাজে সহযোগিতা না করা।
২৩. সৎ কাজের আদেশ দেয়া। অসৎ কাজে নিষেধ করা, বাধা দেয়া।
২৪. সুবিচার করা।
২৫. অন্যদের প্রয়োজনকে অগ্রাধিকার দেয়া।
২৬. কাউকেও অপবাদ না দেয়া, গীবত না করা।
২৭. অন্যায়ভাবে কোনো মানুষকে হত্যা না করা।
২৮. হারাম উপার্জন না করা। সুদ ও সুদী কারবার পরিহার করা।
২৯. ঘুষ, জবরদখল ও অন্যায় পন্থায় কারো অর্থ সম্পদ হরণ না করা।
৩০. ধোকা প্রতারণা না করা।
৩১. কপণতা না করা, আবার সব কিছু উজাড় করে খরচ না করে ফেলা।
৩২. নিজের জন্যে, পোষ্যদের জন্যে সামর্থ্য মতো ব্যয় করা।
৩৩. অপচয় ও অপব্যয় না করা।
৩৪. ব্যয়ের ক্ষেত্রে মিতব্যয়ী হওয়া ও মধ্যপন্থা অবলম্বন করা।
৩৫. করয দেয়া / সময়মতো করয ফেরত দেয়া।
৩৬. মানুষকে দুঃখ কষ্ট না দেয়া।
৩৭. জনপথ থেকে কষ্টদায়ক ও ক্ষতিকর জিনিস অপসারণ করা।
৩৮. জামায়াতের অন্তর্ভুক্ত থাকা।
৩৯. ইসলামী নেতৃত্বের আনুগত্য করা।
৪০. ন্যায়ের প্রসার ও অন্যায়ের প্রতিরোধ গড়ে তোলা।

১৩. বাস্তব আমলে সালেহ্ সমূহ : রাষ্ট্রীয় জীবনে

০১. সুশাসন পরিচালনা করা। ন্যায়পরায়ণ শাসকের আনুগত্য করা।
০২. ন্যায় বিচার করা।
০৩. জনগণের আমানত রক্ষা করা ও পাহারা দেয়া।
০৪. রাষ্ট্রের প্রতিরক্ষা নিশ্চিত করা।
০৫. সালাত কায়েম করা এবং যাকাত ব্যবস্থা চালু করা।
০৬. আমার বিল মা'রুফ (ভালো কাজের আদেশ ও প্রসার)-এর কাজ করা।
০৭. নাহি আনিল মুনকার (মন্দ ও দুষ্কৃতি প্রতিরোধ)-এর কাজ করা।
০৮. জনগণের পারস্পারিক বিরোধ মীমাংসা করা, বিচার ফায়সালা করা।
০৯. জাতীয় সংস্কার সংশোধনের কাজ করা। শিক্ষার প্রসার ঘটানো।

১০. জিহাদ ফি সাবিলিল্লাহর কাজ করা (ইসলামের প্রচার ও প্রতিরক্ষা)।
১১. রাষ্ট্রীয় প্রতিরক্ষায় সৈনিকের দায়িত্ব পালন করা।
১২. চুক্তি ও সমঝোতা করা।
১৩. চুক্তি ও অংগিকার বাস্তবায়ন করা।
১৪. ইসলামী আইন ও দন্ড কার্যকর করা।
১৫. নাগরিকদের মৌলিক অধিকার নিশ্চিত করা।
১৬. অশ্লীলতার প্রসার রোধ করা।
১৭. যার কোনো অভিভাবক নেই, তার অভিভাবকের দায়িত্ব পালন করা।

এখানে আমরা বিভিন্ন বিভাগে যেসব আমলে সালেহর উল্লেখ করেছি, সবই আল কুরআন এবং হাদিস থেকে উল্লেখ করা হয়েছে। কলেবর বৃদ্ধি করা যাচ্ছেনা বলে সংশ্লিষ্ট আয়াত বা হাদিস উল্লেখ করা হয়নি।

১৪. এক কেন্দ্রিক সুরভিত ফুল আর শুভ ফল

ঈমানের শাখা সমূহ তথা আমলে সালেহকে এখানে বিভিন্ন ভাগে ভাগ করে উপস্থাপন করলেও মূলত একজন ব্যক্তির জীবনে আমলে সালেহ সমূহ একেবারেই অবিভাজ্য, সমন্বিত এবং এক কেন্দ্রীভূত। যেমন, অন্তরের আমলে সালেহ সমূহ মৌখিক এবং বাস্তব কর্মের আমলে সালেহ সমূহের সাথে অবিচ্ছেদ্যভাবে সম্পর্কিত। একইভাবে মৌখিক আমলে সালেহ সমূহ অন্তরের এবং বাস্তব আমলে সালেহ সমূহের সাথে ওতপ্রোতভাবে সম্পর্কিত। তাই এখানে বিভাগগুলো মূখ্য নয়, আমলগুলোই মূখ্য।

এ যাবত আমরা আমলে সালেহর যে তালিকা পেশ করেছি এ রকম ধারাবাহিক তালিকা কুরআনে বা হাদিসে পেশ করা হয়নি। বরং প্রয়োজন, পরিবেশ পরিস্থিতি ও অবস্থার প্রেক্ষিতে কুরআনের বিভিন্ন আয়াতে এগুলো উল্লেখ করা হয়েছে। একইভাবে রসূলুল্লাহ সা. বিভিন্ন সময় প্রয়োজন, পরিবেশ পরিস্থিতির আলোকে বিভিন্ন ব্যক্তি বা ব্যক্তিবর্গকে আদেশ, নিষেধ বা উপদেশ আকারে এসব আমলে সালেহর উল্লেখ করেছেন। কুরআন এবং হাদিস হলো শত রকম সুরভিত ফুলের সমারোহে সমৃদ্ধ বাগান। জীবনের সকল ক্ষেত্রে প্রযোজ্য সুন্দর সুফলদায়ক উপদেশই আপনি এখানে পাবেন। এগুলোর সৌরভে নিজেকে সুরভিত করতে পারলেই আপনি সফল, নইলে নিশ্চিত ব্যর্থ বিফল।

যেমন সুফলদায়ক একটি উৎকৃষ্ট জাতের বৃক্ষ। আলো বায়ু পানি তার আহার। তার মূল বা শেকড় হলো তার সঞ্জিবনী শক্তি সরবরাহকারী। তার কাণ্ড ও শাখা প্রশাখা হলো তার কারিগর। তার ফুল হলো তার মুখপত্র। তার ফল হলো তার কর্ম (contribution)। তেমনি ঈমান ও আমলে

সালেহ্ দ্বারা সমৃদ্ধ কুরআন সুন্নাহ সিদ্ধিগত জ্ঞান হলো মুমিনের আহার। তার অন্তর হলো তার সমস্ত কর্মের সঞ্জিবনী শক্তি সরবরাহকারী। তার মস্তিষ্ক হলো তার কর্মের কারিগর। তার যবান হলো তার কর্মের মুখপত্র। তার অঙ্গ প্রত্যঙ্গ হলো তার কর্মের সম্পাদক।

পরকাল, পুনরুত্থান, হিসাব, বিচার ফায়সালা, জান্নাত জাহান্নাম সম্পর্কে একজন মুমিন দিবালোকের মতো স্বচ্ছ সুস্পষ্ট জ্ঞান রাখেন। তিনি জানেন মানুষের জীবন অমর। জীবনের মৃত্যু হয়না, হয় স্থানান্তর। পৃথিবী নশ্বর, ক্ষণস্থায়ী। এখানে মানুষের জীবনকাল ক্ষণিকের, অতিক্ষুদ্র সময়ের। কিন্তু পরকাল অনন্ত জীবনের। সেখানে পৃথিবীর মতো দেহেরও মৃত্যু হবেনা, জীবনকালেরও ক্ষয় হবেনা, লয় হবেনা।

কারো সে জীবন যদি হয় দুঃখের, কষ্টের, শান্তির, যন্ত্রণার, দন্ধের, দহনের, তবে তার চাইতে দুর্ভাগা আর কে আছে?

পক্ষান্তরে যার সে জীবন হবে সুখের, সাফল্যের, পুরস্কারের, পরমানন্দের, তার মতো সৌভাগ্যবান আর কে আছে?

আসুন, ধর্ম বর্ণ নির্বিশেষে সৌভাগ্যের আকাংখী নারী পুরুষ, যুবক যুবতী, কিশোর কিশোরী, সবাই মিলে চলি ঈমানের পথে। আসুন, আমলে সালেহ্‌র গুণাবলীতে শোভামন্ডিত করি নিজের জীবনকে। আল্লাহ্‌র সাহায্য মুমিনদের জন্যে প্রতিশ্রুত।*

সমাপ্ত

* ২০ নভেম্বর ২০০৯ তারিখে অনুষ্ঠিত বাংলাদেশ কুরআন শিক্ষা সোসাইটি আয়োজিত কুরআন ভিত্তিক TOT CLASS -এ উপস্থাপিত।